

Obraćanje visokog predstavnika na “Međunarodnom poslovnom forumu 2014. godine”, u organizaciji Ministarstva privrede Kantona Sarajevo i British Council-a

Vrijedi izgovorena riječ.

Dame i gospodo,

Ovogodišnji “Međunarodni poslovni forum” održava se u dramatičnom periodu koji Bosnu i Hercegovinu stavlja na test.

Kao nikada do sada, od završetka rata, Bosni i Hercegovini je, naravno, potreban svaki oblik pomoći. Ali, što je još važnije, potrebne su joj i investicije kojima se osigurava povećanje javnih prihoda i otvaranje očajnički potrebnih novih radnih mjesta.

No, ono što ovo zemlji zaista treba najviše od svega je katarza – novi početak koji na prvo mjesto stavlja interese običnih građana ove zemlje.

To je ono što sam iz prve ruke čuo u poplavljenim mjestima i gradovima gdje su se obični građani organizovali kako bi postigli zajednički cilj.

Imam osjećaj da je ovo prihvatanje činjenice da je došlo vrijeme za suštinske promjene nešto što su prepoznali i organizatori “Međunarodnog poslovnog foruma”.

Iz tog razloga mi je posebno zadovoljstvo što sam danas ovdje s vama.

* * *

Međutim, čak i prije tragičnih poplava i pokretanja klizišta koja su žestoko oštetila ogromna dijelove BiH, uključujući i područja ovdje u Kantonu Sarajevo, postojala je očajnička potreba za promjenom pristupa, što je neophodno da bi se ova zemlja vratila na pravi put.

No, odakle će doći ove promjene? Paradoks je da promjene često proizilaze iz najvećih izazova i najtežeg iskustva. Dakle, to tako mora biti i ovaj put!

Poučeni hrabrošću i neumornim naporima koje smo vidjeli u područjima pogođenim poplavama i klizištima, potrebno je da ova zemlja sada zajedničkim i jedinstvenim naporima djeluje onako kako to nije bio slučaj tokom prethodnih godina.

Solidarnost i jedinstvo koje smo vidjeli trebali bi poslužiti kao primjer svima nama. Građani ove zemlje su pokazali da žele raditi zajedno sa svojim susjedima na rješavanju problema kako bi ova zemlja ponovo stala na svoje noge.

* * *

Dakle, gdje možemo početi?

Mnogi potencijalni investitori posmatraju Bosnu i Hercegovinu kroz prizmu političkih i administrativnih barijera i prepreka na koje nailaze.

Ono što vide nije ni blizu dovoljno dobro, i ja se slažem s onima koji kažu da preostaje još dosta posla prije nego Bosna i Hercegovina istinski postane destinacija koja je privlačna za poslovanje.

Prema tome, zašto ne bismo ciljali na ta područja, koja – uzgred budi rečeno – često ne koštaju puno da se provedu u praksi.

Tek kada oslobodimo poslovanje i stvorimo uslove za

investiranje možemo iskoristiti značajne prirodne i ljudske potencijale ove zemlje.

Primjeri pojedinaca iz Bosne i Hercegovine koji su uspjeli u inostranstvu i firme koje već uspješno posluju u Bosni i Hercegovini ukazuju na činjenicu da je poslovna kultura u BiH sve modernija i pristupačnija – što je značajan element koji potencijalni investitori uzimaju u obzir.

Provesti promjene možda jeste teško – ali je ipak moguće i one mogu stvoriti bitnu razliku.

Moja poruka vama danas jeste da se svi okupimo i da zajedno ostvarimo napredak kao što smo ga ostvarivali u prošlosti, u vrijeme ogromnih i važnih reformi poput reforme odbrane i uvođenja PDV-a.

Dame i gospodo, mi to ponovo možemo uraditi, ali potrebna je suštinska promjena u pristupu i ona mora početi danas.

* * *

Dame i gospodo, ne treba posebno isticati da je moj Ured spreman podržati napore Kantona Sarajevo i drugih organa da se na najbolji način iskoriste potencijali ove zemlje.

Međutim, više nego ikada potrebno je vidjeti da promjene artikulira i predvodi domaći pokret talentovanih, vrijednih i dobronamjernih ljudi u ovoj zemlji.

Mnogi od vas koji ste danas ovdje imat će značajnu ulogu u osiguranju promjena koje su potrebne. To neće biti lako, ali niste sami i uspjeh ćete.

Danas je dan kada ponovo ističemo našu opredijeljenost da ćemo preduzeti korake koji su potrebni za privlačenje investicija i stvaranje radnih mjesta i prosperiteta koji su ovoj zemlji i njenim građanima tako prijeko potrebni.

Mi ćemo ići sa vama rame uz rame na vašem putu naprijed.

Hvala.